

唐詩紀事

唐詩紀事卷第七十四

僧文秀

僧尚能

僧樓白

僧無可

僧神穎

僧懷潛

僧應物

僧可朋

僧雲表

僧文秀

端午詩云節分端午自誰言萬古傳聞爲屈原堪笑  
楚江空浩浩不能洗得直臣冤

秀唐末詩僧也鄭谷喜秀上人相訪詩有它夜松堂  
宿論詩更入微之句又次韻秀上人長安寺居言懷  
云舊坐松老別多年香社人稀喪亂間出寺只知趨

內殿閉門長侶在深山又重訪秀上人云展畫長懷  
吳寺殿宜茶偏賞雪溪泉又寄題詩僧秀公云靈一  
心傳清塞心可公吟後楚公吟近來雅道相親少唯  
仰吾師所得深好句未停無暇日舊山歸老有東林  
吟曹孤宦甘寥落多謝携筇數訪尋秀南僧也而居  
長安以文章應制故谷送遊五臺詩云內殿評詩切  
身回心未回

僧尚能

中秋旅懷云所畜惟騷雅兼之得固窮望鄉連北斗  
聽雨帶西風稼穡村坊遠烟波路逕通真搜清絕句

恰侶有神功

僧棲白

中秋夜月云尋常三五夕不是不婵娟及到中秋半  
還勝別夜圓清光疑有露皓色爽無烟自古人皆玩  
年來更一年

哭劉得仁云爲愛詩名剛到此風魂雪魄去難招直  
教桂子落墳上生得一枝冤始銷

送造微上人遊五臺及禮本師云寒空金錫響欲過  
渭陽津極目多來鴈孤城少故人與師雖別久於法  
本相親又對清涼月中宵語宿因

送僧歸舊山云談空與破邪獻壽復瑩家白日得何  
偈青天落幾花傳燈皆有分化宿獨無涯却入中峰  
寺還知有聚沙

曹松薦福贈白上人云才子紫檀衣明君寵顧時講  
昇高座懶書荅重臣遲瓶勢傾圓頂刀聲落碎髭還  
聞穿內禁隨駕進新詩

李洞贈白上人云險倚石屏風秋濤夢越中前朝吟  
侶散故國講流終北地聞巴狄南山見磧鴻樓高驚  
雨濶木落覺城空鬼滿期姚監蟬稀別楚公淨瓶光  
照客柱杖朽生虫平地塔千尺半空燈一籠祝堯談

幾句旋鴈海潮東

洞又哭白上人云聞說孤窓卧化時  
首摩羅雨滴空池吟詩堂裏秋開影  
禮佛燈前夜照碑賀雪已成金殿夢  
看濤終負石橋期逢山對月還惆悵  
爭得無情侶祖師

僧無可

中秋翫月云蟾亘天地靜三五對堦  
明照耀超諸夜光芒掩衆星影寒池  
更澈雲冷樹梢青枉值中秋夜長乖  
宿洞庭

金州夏晚陪姚合員外遊金州南池云  
柳暗青波漲

衝萍復嫩苔張筵白鳥下掃岼使君來洲島秋應沒  
荷花晚盡開高城吹角絕騶馭尚徘徊

冬日寄僧友云歛履入寒竹安禪過漏聲高杉殘葉  
落深井凍痕生罷磬風枝動懸燈雪屋明何當招我  
友乘月上方行

白閣未歸日青門又值春半天傾瀑溜數郡見廬峰  
句右張爲取作主客圖

秋夜宿西林寄賈島云暗虫喧暮色默思坐西林聽  
雨寒更盡開門落葉深昔因京邑病併起洞庭心亦  
是吾兄弟遲回共至今

秋日寄厲玄云楊柳起秋色故人猶未還別離何日  
苦少壯豈能閑夜雨吟殘燭秋成憶遠山何當同一  
見語默此林間

廬山寺云千峰盤磴盡林寺昔年名步步入山影房  
房聞水聲多年人跡絕殘月石陰清便可求居止安  
閑過此生

題青龍寺僧房云從誰傳法印不離上方傳夕磬城  
霜下寒房竹月圓烟殘衰木畔客住積雲邊未隱滄  
洲去時來於此禪

新年作云然燈朝復夕漸作長年身紫閣未歸日青



門又值春掩關寒過盡出定草生新自有林中趣誰  
驚歲月頻

贈圭峰禪師云絕壑禪床底泉分落石層露澆高頂  
草雪隱下方燈朝滿傾心客溪連學道僧半旬持一  
食此事有誰能

金州別姚合云日日西亭上春留到夏殘言之離別  
易免以道途難山出一千里溪行三百灘松間樓月  
裏秋入五陵寒

姚合送無可住越州云清晨相訪門前立麻履方袍  
一少年懶讀經文求作佛願攻詩句覓成仙芳春山

影花連寺觸夜湖聲月滿船今日送行偏惜別共師  
文字有因緣

李洞贈可上人云寺門和鶴倚香杉月吐秋光到思  
曉將法傳來穿泐溝把詩吟去尖嵌岩模糊疏卷烟  
嵐滴狼藉衣裳瀑布緘不斷清風牙底嚼無因內殿  
得名街

僧神穎

和王季文題九萃山云衆岳雄分野九華鎮南朝彩  
筆凝空遠崔嵬寄青霄龍潭古仙府靈藥今不凋瑩  
爲滄海鏡烟霞作荒標造化心數竒性狀精氣饒玉

樹鬱玲瓏天籟韻蕭寥寂寂尋乳竇兢兢行石橋通  
泉漱雲母藉草縈香茗我住幽且深君賞昏復朝稀  
逢發清唱片片霜凌颼

宿嚴陵釣臺云寒谷荒臺七里洲賢人求逐水東流  
獨俱叫斷青天月千古冥冥渾樹秋

僧懷濬

秭歸郡僧懷濬不知何所人乾寧初知來歲往皆有  
神驗刺史于公以其惑衆擊而誥之乃以詩代通狀  
云家在閩山西復西其中歲歲有鶯啼如今不在鶯  
啼處鶯在舊時啼處啼又詰之復有詩云家在閩山

東復東其中歲歲有花紅而今不在花紅處花在舊  
時紅處紅守異而釋之詳其詩意侶在海中得非杯  
渡之流乎出北夢瑣言

僧應物

龍潭云石激懸流雪滿灣五龍潛處野雲間暫收雷  
電九峰下且飲溪潭一水間浪引浮槎依北岼波分  
曉日浸東山回瞻四面如看盡須信遊人不欲還

題化城寺云平高選處創蓮宮一水縈流處處通畫  
閣晝開遲日畔禪房夜掩碧雲中平川不見龍行雨  
幽谷遙聞虎哨風偶與遊人論法要真元浩浩理無

窮 應物大中時江南詩僧也與羅鄴唱酬作九華山記

### 僧可朋

可朋丹稜人少與延讓爲風雅之友有詩千餘篇號  
玉壘集會題洞庭詩云水涵天影濶山拔地形高贈  
友人曰來多不似客坐久却垂簾歐陽炯以此比孟  
郊賈島言其好飲酒貧無以償酒債以詩賙之可朋  
自號醉髡贈方干詩云月裏豈無攀桂分湖中空賞  
釣魚休杜甫舊屋云傷心盡日有啼鳥獨步殘春空  
落花寄齊已云唯陪北楚三千客多話東郊十八賢  
劉公詩話云有詩僧讀洪州藤王閣詩謂守者詩總

不佳何不除却守云僧能佳乎即吟曰洪州太白方  
積翠滿穹蒼萬古遮新月半天無夕陽守異之然南  
方浮屠能詩者多矣予嘗見可朋詩云虹收千丈雨  
潮弄半江天又云詩因試客分題僻碁爲饒人下着  
低不減唐人詘詩

孟祖廣政十九年賜詩僧可朋錢十萬帛五十疋

孟蜀歐陽迥與可朋爲友是歲酷暴中歐陽命同僚  
納涼於淨衆寺依林亭列樽俎衆方懽適寺之外皆  
耕者曝背烈日種耘田擊腰鼓以適倦可朋遂作耘  
田鼓詩以贄歐陽衆賓悶已遽命撤飲詩曰農舍田

頭鼓王孫筵上鼓擊鼓兮皆爲鼓一何樂兮一何苦  
上有烈日下有焦土願我天翁降之以雨令桑麻熟  
倉箱富不飢不寒上下一般言雖淺近而極於理君  
子謂可朋諫而歐陽善聽焉

朋賦洞庭云周極八百里凝眸望則勞水涵天影澗山拔  
地形高賈客停非久漁翁轉幾遭颯然風起處又是鼓濤濤

僧雲表

寒食詩云寒食悲看郭外春野田無處不傷神平原  
壘壘傷新塚半是去年來哭人

唐詩紀事卷第七十四

唐詩紀事卷第七十五

僧虛中

貫休

僧齊己

殷七七

許碣

許宣平

裴修然

僧虛中

寄中條司空留侍郎詩曰門徑放莎垂往來投刺稀  
有時聞御禮特地掛朝衣嶽信僧傳忞天香鶴帶歸  
他年二南肯無復更衰微

聞一作開

又云道遙短褐成一劍動精靈白晝夢仙島清晨禮  
道經黍苗侵野逕葉樵汚閑庭肯要爲鄰者西南太  
華清



尚贈虛中云十年華嶽峰前住只得虛中兩首詩言  
得其意趣也

虛中宜春人也遊瀟湘山水與齊已尚顏栖蟾爲詩  
友住湘西粟城寺潭州烏氏子希振侍中好事每出  
迎納於詩閣虛中好燒火烟昏彩翠去後又復粉飾  
又題馬侍郎池亭云嘉魚在深處幽鳥立多時

聽軒轅先生琴云訣妙與功精通宵膝上橫一堂風  
冷淡千古意分明坐客神魂疑巢禽耳目傾酷哉傷  
紂世曾不遇先生

芳艸云綿綿芳草綠何處動深思金谷人亡後沙場